



LE GOUVERNEMENT
DU GRAND-DUCHÉ DE LUXEMBOURG
Ministère des Affaires étrangères
et européennes

Le Ministre

Luxembourg, le 14 mai 2021

Le Ministre des Affaires étrangères et européennes

à

Monsieur le Ministre aux Relations avec le Parlement

J'ai l'honneur de vous faire parvenir en annexe, la réponse commune des Ministres impliqués à la question parlementaire n° 4093 posée par l'honorable Député Monsieur Fernand Kartheiser.


Jean Asselborn

Äntwert vum Här Aussen- an Europaminister a vum Här Verdedegungsminister op d'parlamentaresch Fro Nummer 4093 vum 16. Abrëll 2021 vum honorabelen Deputéierten, dem Här Fernand Kartheiser

1. D'Alliéiert hunn sech iwwert déi lescht Wochen a Méint regelméisseg iwwert hir Presenz am Afghanistan consultéiert. Am Kader vun dëse Consultatioune gouf Lëtzebuerg am Conseil vun der NATO och regelméisseg iwwert de leschte Stand vun interne „review process“ vun den USA a Kenntnis gesat. Mir waren, mat allen aneren Alliéierten, informéiert iwwer déi verschidden Optiounen, déi fir d'Amerikaner a Fro koumen. Lëtzebuerg gouf och am Virfeld iwwert d'Decisioun vun den USA, hir Truppen ofzezéien, informéiert. D'Decisioun, d'NATO „Resolute Support“ Missioun (RSM) op en Enn ze bréngen, gouf gemeinsam vun allen Alliéierte geholl.
2. Den Ofzuch vun de Forcé vun der RSM huet kuerz virum 1. Mee ugefaangen a wäert geuerdent, koordinéiert a beduecht oflafen. Et ass geplangt, den Ofzuch vun allen Truppe bannent e puer Méint ëmgesat ze hunn. D'Lëtzebuurger Membere vun der RSM wäerten Enn Mee ofgezu ginn.
3. Um militäresche Plang konnt den Asaz vun den Alliéierten am Afghanistan verhënneren, datt d'Land erëm als Refuge fir Terroriste kéint déngen, déi vum Afghanistan aus alliéiert Länner géifen ugräifen. Zënter der Attack op d'USA den 11. September 2001 goufen et vum Afghanistan aus keng terroristesch Attacke méi op d'alliéiert Länner. D'NATO huet och gehollef d'afghanesch Sécherheetskraefte opzebauen, déi iwwert déi lescht Joren dozou bäigedroen hunn, datt d'Sécherheetslag am Land besser ginn ass.

Donieft huet den Engagement vun der NATO a vun der Europäescher Unioun am Afghanistan dozou bäigedroen, gesellschaftlech Fortschreitter ze erreechen, besonnesch wat d'Rechter vun de Fraen, vun de Kanner, a vun de Minoritéiten ugeet. Déi politesch Ziler am Beräich vun der Demokratie, der Rechtsstaatlechkeet, oder de Rechte vun de Fraen, vun de Kanner a vun de Minoritéiten, gi weiderhi verfolgegt, notamment am Kader vun der gemeinsamer Aussen- a Sécherheetspolitik vun der EU. De politesche Bilan hänkt och vum Erfolleg vum intra-afghanesche Fridensprozess of, deen den Ament nach leeft, an dee vun der internationaler Communautéit begleet gëtt. Zesumme mat eise Partnere wäerte mir eis weiderhin dofir asetzen, datt déi politesch a gesellschaftlech Acquis'en vun deene leschten 20 Joer erhale bleiwen.

4. D'Contributiounen am Beräich vun der Défense belafen sech op 51,9 Milliounen Euro zënter 2001. Dee Montant besteet haaptsächlech aus de Contributiounen un den Afghan National Army Trust Fund zënter 2006. Lëtzebuerg hat um NATO Sommet 2018 annoncéiert, dës Contributioun bis 2024 ze verlängeren, mat enger Contributioun vu 4 Milliounen Euro d'Joer. Den Deployment vun der Arméi huet zënter 2003 ongeféier 7 Milliounen Euro kascht.

Am Beräich vun der Entwécklungszesummenaarbecht an der humanitärer Hëllef huet Lëtzebuerg zënter 2000 ronn 52,5 Milliounen Euro un d'Agencé vun de Vereenten Natioune contribuéiert, fir Projeten a Beräicher wéi Education, Santé an Développement agricole, awer och fir humanitär Operatiounen ze ënnerstëtzen.

5. D'Sécherheet vun den Afghanen an hire Familljen, déi um Terrain an der „Resolute Support“ Missioun matgehollt hunn, ass fir d'international Communautéit vu grousser Wichtigkeet. Diskussiounen, wéi een deene Leit am Beschte kann hëllefen, sinn nach am gaangen. Nieft der Sécherheetssituatioun ass och déi ekonomesch Stabilitéit immens wichteg an deem

Kontext, an déi zwou sinn enk matenee verbonnen. D'EU wäert sech zesumme mat hire Partneren an der Regioun weiderhi fir d'Stabilitéit a fir eng nohalteg Entwécklung am Afghanistan asetzen, mam Zil d'Fortschrëtter vun de leschten 20 Joer héichzehalen. D'Entwécklung vun der Migratioun aus dem Afghanistan ass staark ofhängeg vun de Resultater vum intra-afghanesche Friddensprozess, déi am Moment net anzeschätze sinn.

6. Den Niveau vu Gewalt am Land ass weiderhin inakzeptabel. Dat huet een nach eng Kéier gesinn, wéi den 8. Mee mindestens 50 Leit, dorënner vill Meedercher, hiert Liewen hu misse losse wéi eng Terrorattack eng Schoul zu Kabul viséiert huet.

Villes wäert vun den intra-afghanesche Friddensverhandlungen ofhänken, déi de Moment zu Doha gefouert ginn. An de leschte Woche goufen et zousätzlech Initiative vun der internationaler Gemeinschaft fir dee Prozess virunzebréngen. Villes wäert och vum Engagement vun den USA ofhänken. De President Biden huet kloer gemaach, dass d'USA weiderhi wäerten an d'Zukunft am Afghanistan investéieren, och wann d'Truppen ofgezu ginn. Den Ofzuch vun den NATO-Truppen aus dem Afghanistan war keng einfach Entscheidung, an et war eng Entscheidung déi och gewëss Risike mat sech bréngt, déi d'NATO wäert versichen op e Minimum ze reduzéieren. D'NATO, d'EU an déi international Communautéit bleiwe weiderhi ganz opmierksam, wat d'Sécherheetslag an Afghanistan ugeet.

7. Lëtzebuerg hat um NATO Sommet 2018 annoncéiert, d'Contributiounen zum Afghan National Army Trust Fund vun der NATO mat enger Contributioun vu 4 Milliounen Euro d'Joer bis 2024 ze verlängeren.